

Na Memoria di Roland Narcisio Kock (Chicho)

2 di september 1952 – 19 di februari 2025

MINISTERIO di Cultura y Departamento di Cultura Aruba ta lamenta profundamente e fayecimento di Roland Narcisio Kock, miho conoci como Chicho. Cu su fayecimento, Aruba ta perde un gran baluarte den musica: un bahista, compositor y cantante cu a dedica su bida na arte musical.

Bida personal

Roland Narcisio Kock a nace dia 2 di september 1952 na Weg Sero Blanco y despues a muda pa Weg Sero Preto. Su tata yama José Maria Kock (†) y su mama Maria Kock. Nan tabata ocho ruman y Chicho mes tabata di cinco ruman. Aunkue nunca el a casa, e ta tata di cuatro yiu muhe: Yahaira Jundru, Kini Kariana Kock, Katleen Carien Kock y e mas chikito, Narisma Roulien Kock. Den su famia tabatin mas musico, incluyendo su ruman mayor cu tabata tocado fio, trompetista y cantante. Desde chikito, Chicho tabata conoci pa su apodo “Chicho el Feo”, pero despues “el Feo” a bira un recuerdo di pasado y e a keda simplemente Chicho.

Musica: Su bida y pasion

Chicho semper a considera su talento musical como un regalo di Dios. Musica tabata su pan di cada dia; cada cen cu el a gana tabata bin di su arte. Desde chikito, el a desaroya un gran amor pa musica y su carera a crece constantemente. Su prome contacto cu musica: Aña 1963 na edad di 11 aña, Chicho a cuminsa toca steelpan den banda The Invaders.

N’e principio, el a practica guitarra, pero eventualmente el a cambia pa baho, cu a keda su instrumento principal. El a toca den Jumping Jewels hunto cu Ronnie Kock, participando na hopi competencia y siñando hopi cos di musica. Ademá di baho y guitarra, el a domina drum, conga, timbal, cuatro, tambu, wiri y otro instrumento di percusion.

Trayectoria musical

Den su bida artistico, Chicho a traha cu hopi banda y artista renombra, manera Sensacion del Caribe (banda principal cu el a toca durante 9 aña), Grupo musical den Hulanda (Killing Ringelings – baho, timbal y conga), Musical Time (7 aña hunto cu Edwin Abath y Hildward Croes (†) y Pride (grupo cu el a yuda lanta y tabata su ultimo banda oficial). Den e Festival di Tumba, Chicho a participa 39 biaha, di cual 36-37 biaha el a yega finalista y a bira Rey di Tumba 4 biaha na 1985, 1997, 2001 y 2004. Su tumba mas conoci ta “E Burico” y otro exito tabata “Pal’i Coco”. E hit grandisimo “Keda So” a bira un clasico, e ta graba na 1986, cu tambe ta un composicion y canta di Chicho mes.

Ademas, Chicho tambe a traha cu Hector Lavoe y Willy Colon, cu kende el a toca na Bonaire Club. Ademá di musica, Chicho tambe tabata un fiel amante di Dragrace y tabata driver di “E Gago”.



Logronan internacional

Chicho a trece su talento pa diferente skina di mundo, manera Colombia cu Sensacion del Caribe, na Venezuela cu Pride, den show Sábado Sensacional, na Punto Fijo, presentando den e Campo di Shell como “open act” pa Fantasma del Caribe y Europa.

Conseho p’e hobennan di musica

Chicho a considera disciplina y dedicacion como clave pa exito musical. Su mensahe cu e ta laga atras p’e hobennan di Aruba ta: Sigui bo pasion, pero wak pa semper bo ta na ora y traha na un nivel profesional; tuma bo trabou di musico serio y muestra cu bo por haci miho; bo no mester depende di mashin; si bo por toca “live”, bo tin mas balor como artista; studia bo instrumento of perfecciona bo talento natural; y, sin duda, musica no ta un trabou facil, pero cu pasion y dedicacion, bo por logra cosnan grandi.

Legado di un artista berdadero

Roland Narcisio “Chicho” Kock lo keda pa semper den e historia di musica Arubano. Su talento, su entrega y su pasion lo inspira generacion tras generacion.

Ministerio di Cultura y Departamento di Cultura Aruba ta extende su condolencia na su sernan keri, yiu-, famia-, musico-, amigo- y conocirnan. Aruba ta honra su legado y su musica lo continua vibra den nos curasonnan.

Cu Chicho descansa na paz.